

- मुख्यमंत्री भजनलाल शर्मा कह्यो—साल 2027 ताई सगळा ज़िला मांय खेती-बाड़ी अर कारखाना सारु दिन मांय ई बिजली देवणो सुरु कर दियो जावेला।
- प्रदेश मांय लारला दो साल मांय सात हजार नौ सौ ऊँ बत्ता गांव जल जीवन मिशन ऊँ जोड़ी ज्या।
- प्रधानमंत्री नरेन्द्र मोदी कह्यो—भारत अर इथियोपिया मिल र न्याय, बराबरी अर शांति वाळी दुनिया बणावण सारु काम करेला।
- संसद निरस्तीकरण अर संशोधन बिल 2025 पास कीनो।

000

मुख्यमंत्री भजनलाल शर्मा आज जालौर ज़िला रा आहौर मांय विकास रा 338 करोड़ रुपया ऊँ बत्ता खर्चा वाळा पूरा व्ह्या काम जनता ने संप्या अर नुवा कामां री सुरुआत कीनी। ई मौके राख्यी ज्यी जनसभा मांय श्री शर्मा कह्यो के वां रा राज मांय वायदा रे मुताबिक पांच साल मांय चार लाख नौजवानां ने सरकारी नौकरी दी जावेला। वे कह्यो के सरकारी नौकरी हासिल करण री कोशिश सागे नौजवानां ने खुद रा काम धंधा सुरु करण बाबत ई कोशिश करणी चाहिजे।

मुख्यमंत्री कह्यो के वां रा राज रा दो साल मांय 22 ज़िलां रा किसानां ने दिन मांय ई बिजली मिलण लागी है। वे साल 2027 ताई प्रदेश रा सगळा ज़िलां मांय किसानां अर कारखानां सारु दिन मांय ई बिजली मुहैया करावण रो भरोसो दिरायो। श्री शर्मा कह्यो के लारला दो साल मांय कांग्रेस राज रा पांच साल रे मुकाबले बत्तो काम व्ह्यो। मुख्यमंत्री ग्रामीण अर शहरी समस्या समाधान शिविर रो दौरा ई कीनो। ई दौरान वे लोगां ने पट्टा, गोपाल क्रेडिट योजना समेत न्यारी-न्यारी योजनावां रे रा तैत मदद री रकम रा चैक अर सर्टिफिकेट दीना। वे दिव्यांगजन ने स्कूटी ई बांटी।

000

जन स्वास्थ्य अभियांत्रिकी मंत्री कन्हैया लाल चौधरी कह्यो है के लारला दो साल मांय 7 हजार 900 ऊँ बत्ता गांवां ने जल जीवन मिशन ऊँ जोड़ी ज्या। वे जल संसाधन मंत्री सुरेश रावत सागे आज जयपुर मांय खबरनवीसां सागे बातचीत रे दौरान वां रा महकमा मांय लारला दो साल मांय करायी ज्या कामां री जाणकारी दे रह्या हा। श्री चौधरी बतायो के प्रदेश रा लारला कांग्रेस राज मांय करीब 3 हजार 900 करोड़ रुपया रा खर्च ऊँ नळ रा केवल 11 लाख कनेक्शन दिया ज्या हा, जद के मौजूदा राज मांय जल जीवन मिशन ऊँ जुड्या कामां माथे 5 हजार 300 करोड़ रुपया खर्च कर्या जा चुक्या है।

श्री चौधरी बतायो के 'अमृत 2' योजना रा तैत नगर निकायां मांय तेजी ऊँ काम कराया जा रह्या है। जल संसाधन मंत्री सुरेश रावत बतायो के पूर्वी राजस्थान नहर परियोजना-ईआरसीपी ऊँ जुड्या कामां सारु मध्यप्रदेश शासन अर केंद्र सरकार सागे करार करी ज्यो है अर 9 हजार 600 करोड़ रुपया रा वर्कऑर्डर जारी कर दिया ज्या है। वे कह्यो के शेखावाटी ताई यमुना नदी रो पाणी पूगावण ऊँ जुड्या कामां री डीपीआर बेगी ई तैयार करी जावेला।

000

राज्य री मौजूदा सरकार रा काम-काज रा दो साल पूरा व्हेवण रा सिलसिला मांय आखा प्रदेश मांय **बढ़ता राजस्थान-हमारा राजस्थान** कार्यक्रमां रा तैत विकास प्रदर्शनियां लगायी जा रही है। बालोतरा मांय लगायी ज्यी प्रदर्शनी ने स्कूली विद्यार्थी उमाव ऊँ देखी अर पीएम सूर्यघर मुफ्त बिजली योजना, पाणी बचावण अर खेती-बाड़ी री नुवी तकनीक ऊँ जुड्या मॉडल रा बारा मांय जाणकारी हासिल कीनी। सवाईमाधोपुर मांय प्रचार रथां रे जरिये जनता रा भला री योजनावां री जाणकारी दी जा रही है।

000

भ्रष्टाचार निरोधक ब्यूरो री एसआईटी जल जीवन मिशन घोटाला मामला मांय आज पांच आरोपितां ने जयपुर रा न्यारा-न्यारा हलकां ऊँ गिरफ्तार कीना। ब्यूरो रा महानिदेशक गोविंद गुप्ता आ जाणकारी दीनी। वे बतायो के गिरफ्तार करी ज्या आरोपितां मांय फर्मा चलावण वाळा अर वां बगत रा लेखाधिकारी शामिल है। श्री गुप्ता कह्यो के आं माथे महकमा रा अहलकारां सागे मिलीभगत कर र मोटी रकम रा टेंडर लेवण अर घटिया काम कर र सरकारी खजाना ने नुकसाण पूगावण रो आरोप है। ए.सी.बी. रा महानिदेशक बतायो के तकनीकी जांच-पड़ताल अर रिकॉर्ड करी ज्यी बातचीत ऊँ आरोपितां कानी ऊँ

अहलकारां ने घूस देवण अर सबूतां ऊँ छेड़खानी करण री ठा पड़ गयी है। ई मामला मांय छः आरोपित पैली ई गिरफ्तार कर्या जा चुक्या है।

000

प्रधानमंत्री नरेन्द्र मोदी कह्यो है के भारत अर इथियोपिया एक परिवार रा सदस्य रा तौर ऊँ एक-दूजा रे सागे है अर न्याय, समानता अर शांति सारू मिल र काम करेला। प्रधानमंत्री आज संवारे इथियोपिया री संसद ने संबोधित कर रह्या हा। वे कह्यो के वैश्विक दक्षिण वां रो भविष्य खुद लिख रह्यो है अर भारत अर इथियोपिया ई सारू साझा नजरियो राखे है।

000

संवैधानिक संस्थावां रा कथित बेजा इस्तेमाल रो आरोप लगाता थकां कांग्रेस रा कार्यकर्ता आज जयपुर मांय प्रदर्शन कीनो। प्रदेश कांग्रेस अध्यक्ष गोविंद सिंह डोटासरा अर विधानसभा मांय विपक्ष रा नेता टीकाराम जूली री अगुवाई मांय कांग्रेस रा कार्यकर्ता प्रदेश कांग्रेस रा दफ्तर ऊँ भारतीय जनता पार्टी रा प्रदेश कार्यालय ओड़ी पैदल मार्च सारू कीनो, जिण ने पुलिस गेला मांय ई रोक दीनो। ई दौरान कांग्रेस रा कार्यकर्ता भाजपा रे खिलाफ नारा लगाया। प्रदेश कांग्रेस अध्यक्ष गोविंद डोटासरा अर विधानसभा मांय विपक्ष रा नेता टीकाराम जूली समेत केई नेता गिरफ्तारियां ई दीनी।

000

देश मांय मई 2014 ऊँ हाल ताई एक हजार 577 कानून खत्म कर दिया ज्या है। आं मांय ऊँ एक हजार 562 कानून पूरी तरह निरस्त कर दिया ज्या जद के 15 कानून दुबारा बणायी ज्या। केंद्रीय विधि और न्याय मंत्री अर्जुनराम मेघवाल आज राज्यसभा मांय आ जाणकारी दीनी। वे सदन मांय निरसन और संशोधन विधेयक, 2025 पेश कीनो, जिण ने सदन चर्चा पाछे पास कर दीनो। लोकसभा इण ने पैली ई पास कर दीनो हो।

000

सूचना अर प्रसारण राज्य मंत्री डॉ. एल. मुरुगन कह्यो है के प्रसार भारती सांस्कृतिक पहुंच ने बधावो देवण अर कार्यक्रमों रे मार्फत आमदनी हासिल करण सागे सार्वजनिक सेवा दायित्व ने पूरा करण सारू कंटेंट सिंडिकेशन नीति, 2025 रो मसौदा तैयार कीनो है। वे आज लोकसभा मांय दिया ज्या लिखित जवाब मांय कह्यो के ई नीति रो मकसद आकाशवाणी अर दूरदर्शन कानी ऊँ बणायी ज्या कार्यक्रमों अर सरकारी कार्यक्रमों, त्यौहारों अर खेलों रा सीधा प्रसारण प्रसारण रे जरिये आमदनी बधावणो है। मसौदा नीति सुझाव देवण सारू प्रसार भारती री वेबसाइट माथे देखी जा सके है।

000

रेलवे मुसाफिरों री हिफाजत सारू ईजाद करी ज्यी कवच तकनीक दो हजार किलोमीटर ऊँ बत्ती लम्बी लेणों माथे लागू कर दीनी है। रेल मंत्री अश्विनी वैष्णव आज लोकसभा मांय प्रश्नकाल रे दौरान पूरक सवालों रा जवाब मांय आ जाणकारी दीनी। ई बीच जोधपुर रा मंडल रेल प्रबंधक अनुराग त्रिपाठी आज बालोतरा रेलवे स्टेशन रो दौरों कर र वठे 'अमृत भारत स्टेशन योजना' रा तैत कराया जा रह्या कामों रो जायजो लीनो। वे बतायो के 19 करोड़ रुपया ऊँ बत्ता खर्च ऊँ कराया जा रह्या अ काम बेगा ई पूरा कर लिया जावेला। निरीक्षण रे दौरान डीआरएम बालोतरा-पचपदरा नई रेल लाइन रा बारा मांय ई चर्चा कीनी। वे कह्यो के न्यारी-न्यारी ठोड़ों ऊँ बेहतर रेल जुड़ाव ऊँ हलका रा विकास माथे घणों फर्क पड़ेला।

पश्चिमी रेलवे रा महाप्रबंधक विवेक कुमार गुप्ता ई आज अहलकारों सागे चित्तौड़गढ़ रेलवे स्टेशन रो दौरों कर र स्टेशन परिसर, प्लेटफॉर्म, वेटिंग हॉल अर पटरियां पार करण सारू बणायी ज्यी पुलिया समेत न्यारी-न्यारी ठोड़ों साफ-सफाई रो जायजो लीनो।

000

राज्य रा सरकारी कर्मचारियों सारू चलायी ज्यी स्वास्थ्य योजना— आरजीएचएस रो गलत तरीका ऊँ फायदो लेवण वाळा 1 हजार 32 जणा रा कार्ड बंद कर दिया ज्या है अर केई कर्मचारियों ने मुअत्तल कर दिया ज्या है। मुख्यमंत्री रा दफ्तर ऊँ मिली जाणकारी रे मुजब योजना रा तैत कामों मांय गड़बड़ियां करण रा आरोप मांय आज बीकानेर री एक गैर— सरकारी प्रयोगशाला ने पैनल ऊँ हटा दीरीजी है अर दवाई री छह दुकानों अर एक अस्पताल मांय आरजीएचएस ऊँ जुड़्या काम रोक दिया ज्या है। ई योजना रा तैत चालू माली साल मांय नवंबर महीना ताई 2 हजार 267 करोड़ रुपया मोल रा दावा मंजूर करी ज्या।

000

अजमेर मांय गरीब नवाज ख्वाजा मोइनुद्दीन हसन चिश्ती रो आठ सौ चौदहवों उर्स सारू व्हे गयो है। ई री सुरूआत रे मौके भीलवाड़ा रा गौरी परिवार री ओर ऊँ बुलंद दरवाजा माथे झंडो चढ़ायी ज्यो।